



予我上數念的彼个人

昨昏暝我又閣夢著你矣……

佇咧夢中的你，猶原是真莊嚴，恰你在生的時陣全款，一點仔都無變……自從你過身了後，這是我第二擺夢著你……

我永遠都會記得第一擺夢著你，是你過身無佬久，去嘉義共你送了了後，我的心情就親像是挂著大風的風湧，無法度平靜。彼暝，我真數念你，倒佇眠床頂，反來反去，睏袂落眠。頭殼內，干焦想講你到天頂了後，敢會共我放袂記？後擺我若是想你、我若有話想欲共你講，按呢我欲按怎？我一个人覘佇棉襪被內底，一面看著你的相片一面吼，吼甲睏去。講起來，嘛是真聖，彼暝，我就夢著你矣。

佇咧夢中，是下課時間，你坐佇教室頭前，同學攏咧做家己的代誌，予你罵慣勢的我，目睷根本都毋敢掃對你彼引去。啥人知影，你雄雄共我叫去，講：「是按怎交男朋友無共老師講？」。我聽了煞驚一趲(tiô)，就睏袂去。精神過來，才知影原來這是一場夢，嘛因為看著你真安心，所以我真緊就閣睏去矣。

最近，我為著學業的代誌咧操煩，毋知影到底欲去考研究所抑是欲去實習做老師？我就想起著佇我高中的時陣，你三不五時攏會講，畢業了後的學姊定定攏嘛會轉來揣你講心事，無論是學業抑是愛情。彼時陣，阮攏毋相信，心內想講：「老師遮爾歹，到底有啥(siang)會閣轉來揣你討論？家己褒較袂臭臊啦。」啊毋過，到這馬我才知影，老師你講的攏是事實。高中三年逐工攏恰你生活做伙，讀冊做伙、食飯做伙食、耍嘛耍鬥陣，我敢講：「你是全學校上認真、負責的導師，嘛是全校上關心學生的老師！」

阮學校，是一間私立中學，升學的壓力已經真大，而且你恰恁翁閣攏是tshūa資優班，閣再加上你的身體本來就無好，欲tshūa阮三冬，真正是一个真食力的工作。佇咧阮高三的時陣，有幾若擺，你攏因為身體袂堪得(kham--tsit)，煞來請假。有當時仔，上課到一半，你就會雄雄頭楞(gong)，無法度講課，叫阮家己看冊；自阮一年仔到三年，阮講課從來就毋捌用mài-khuh(MIC)，但是彼站仔，你攏愛靠伊才有法度上課，阮逐家攏真煩惱。

猶閣會記得，老師你對我非常嚴格，而且嘛因為我的外務傷濟，定定愛請公假代表學校去參加比賽抑是主持學校的活動，所以彼當陣，課業的成績無蓋好，你真受氣，共我警告講：「你後擺考試的成績若是無進步，我就不准你參加任何的活動！」我彼時陣聽了嘛是

真受氣，因為我就是無想欲予逐家感覺咱資優班就是干焦會讀冊，其他啥物攏袂曉。欲接近大學學力測驗的時陣，你逐工攏會叫我去問，看我昨昏讀啥物冊，閣規定我考試一定愛考幾分，嘛定定佇阮歇晝的時，共我叫去辦公室，你有喙講甲無瀾(nūa)，叫我無論如何，一定愛考著國立大學，若無會共你削(sia)面子。你敢知影，就是因為有你這句話，我才會拚死拚活欲來考著國立大學，予你面子，嘛予我家己一个面子。

彼冬，阮班四十八个人，有四十二个學生考著國立大學，學校真歡喜，佇咧上課時間放送予全校聽閣放炮仔，你嘛真歡喜，講阮攏無予你失望，因為就連你上煩惱的我，嘛已經考著國立大學，老師：你總算會當照你的願望，袂閣做導師矣，因為做一个資優班的導師，壓力真正是真大，阮攏知影，對阮一年仔開始到阮高三畢業，老師你的身體只是愈來愈穩，啊毋過就算是按呢，老師猶是真認真負責，想欲予阮班、學校、阮的家長，閣有上重要的——伊家己一个交代，才來退休。但是我千千萬萬想袂到，畢業了後我閣再看著你的時陣，竟然是佇咧加護病房……

彼工我趕到位，已經是暗時八點半，我印象猶原真深，加護病房外面，有真濟欲來共老師看的人，有老師學校的同事、老師教過的學生、老師厝內的人，逐家攏真緊張，因為醫生講：「老師本來身體就無好，做資優班的導師閣上忝(thiam)，肝有真大的問題……老師可能咧欲無法度矣……」因為是加護病房，所以開放的時間，只有十分鐘。我佻同學佇外面排隊，總算等到換阮看的時陣，阮手牽手做伙行入病房，一看著老師，我的目屎就輾(liàn)無停，我掠準是講我看著老師，會有真濟話欲共伊講，但是我煞一句話都講袂出來……哪會變成按呢啦……原本真有威嚴、上課真有活力的林老師，這馬哪會變成插sàng-sooh恬恬倒佇遐做彼个無法度反抗的人……我真正無願意相信……世間哪會遮爾仔無公平……遮爾仔好的老師，遮爾仔認真咧教冊、關心學生，竟然會得著這款的病痛，我替老師感覺真毋甘願……

過無幾工，老師就轉去矣……

我心內想的是：老師定咧共阮講，伊退休了後想欲搭一間溫室來種伊上俗意的花草；閣想欲佻少年人全款學拍網球；嘛欲逐工陪你挂高一的乖囡做作業、耍電動；你毋是講：等阮畢業十年了後，欲開一擺同學會，看逐家變甲按怎？過十年著愛開一擺，另外，交男朋友、結婚、生囡嘛愛共你請甲到，若按呢這馬咧……老師，敢講，你講過的話，你攏放袂記looh？

這擺閣夢著你，我相信你一定是知影我最近心情無蓋好，才轉來揣我的啦，著無？你本來就真疼我，雖然真愛共我唸，但是我真正知影你攏是好意，進前我攏會掠準你是故意欲揣我麻煩，才會按呢一直注意、監督我的每一項代誌，但是這馬，老師，我已經大漢矣，會當了解你對我的苦心，未來，我嘛可能是一个欲做老師的人，我希望我嘛會當用親像老師遮爾頂真的態度來對待我的學生，用真心來關心個、用耐心來鼓勵個、用愛心來教育個，因為，我想欲佻老師全款，做一个成功的老師！

老師：真正真多謝你，這擺若無夢著你，我一定閣愛鬱卒幾若工，因為有你的出現，重新予我希望，我袂閣再躊躇(tiū-tū)矣，我會努力行向我的夢，因為我知影，無論你佇佗位，你永遠攞會支持我！我嘛欲感謝你，佇我高中三年，遮爾仔重要的日子，多謝有你的陪伴、有你的指導，予我愈來愈捌代誌，嘛愈來愈會曉想。我相信：我這世人，若無拄著你，就無今仔日的我。最後，多謝老師對我付出的一切一切，我會永遠永遠園佇心內……祝福你，佇天頂也會當過甲真快樂！

創作理念

這篇文章，是欲寫予已經離開阮的高中老師。阮老師將伊生命最後三年的青春、心力，全部園佇阮的身上，一心想欲予阮全班的同學，攞會當順利來考著大學，想袂到，等阮攞成功考著國立大學的時，伊然來離開阮……可能是因為傷過數念伊，所以自伊離開了後，我夢著伊幾若擺，我真歡喜嘛真心痛…會當夢著伊我當然嘛真歡喜，但是等到夢醒矣，著啥物攞無去矣……所以才會寫這篇文章來感念伊對阮的愛閣有來抒發我對伊的數念。

許沛琳

國立臺中教育大學臺灣語文學系

